

s'isola de Sant'Antiogu puru, ma candu iant circau de passai su Sulcis, fiant istaus firmaus de unus cantu militzianus sardus.

Invècias sa flota frantzesa, cun 1200 cannonis, si fut presentada in totu is fortzas suas su 23 gennàrgiu 1793 ananti a Casteddu e su Vicerè Balbiano, chi teniat pagu sordaus e pagu cannonis, iat timiu e iat pentzau chi non si podiat fàiri resistèntzia peruna. Ma non dda pentzant diaici is Istamentus de sa Crèsia e de sa Nobiltadi. Custus fiant su Parlamentu antigu de su Rènniu de Sardigna, ma is Piemontesus non ddus atobiant mai e custu non ddis fadiat prexeri.

Bidendi sa flota frantzesa pronta a gherrai, sa crèsia e is nobilis sardus iat tentu sa punna de non s'arrendi. Po custu iant apariciau sa resistèntzia. Su 27 de Gennàrgiu 1793 sa flota frantzesa iat bombardau sa tzitadi de Casteddu. Su 14 de friàrgiu fiat inghitzau s'isbarcu a mannu is frantzesus a Margine Rosso (Marghini Arrùbiu)... Ma fiant istadus firmaus de is militzianus sardus e si nci fiant dèpius andai. Fallida sa pigada de Casteddu, nci fut istètia cussa, fallida etotu, in s'isola Maddalena. Tocat a nai, duncas, ca is voluntàrius sardus iant fatu sa parti manna de sa resistèntzia contras is frantzesus.

De inguni s'arrennegu de is sardus e is CINCU PREGUNTAS de presentai a manu a su Re in

Torino chi no iat atzetau nisciuna de is preguntas sardas. De inguni s'avalotu in Casteddu de su 28 abrili 1794 chi iat portau is sardus a aciapai e impresonai totu is piemontesus, ddus pònniri in dd'una navi e nci ddus mandai a Torino.

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu

serviziocultura@comune.baressa.or.it iscriendi su nòmini, su sangunau e "bollu arriciri *Novas baressesas*". In prus, s'at podi ligi puru in sa bacheca comunali o agatai in medas atividadis comercialis de sa biddu o in sa biblioteca comunali



Comunu de Baressa
Provintzia de Aristanis

Sa redatzioni de *Novas Baressesas* est contivigiada de su Servìtziu linguìsticu sardu e s'Assessorau a sa Cultura de su Comunu de Baressa.

S'isportellu linguìsticu est a disponimentu de tzitadinus, maistus de iscola, professoris e istudentis po cali si siat informatzioni, profundamentu, duda, crosidadi, bibliografia asuba de sa lingua sarda, po consulèntzias didàticas e po contzillus chi pertocant is arrègulas de iscrivura de su sardu.

Su Servìtziu in Maju est abertu ònnia mèrcuris de is ùndixi mancu binti a is tres mancu binti (10.40 – 14.40)



Comunu de Baressa
Provintzia de Aristanis

Novas Baressesas

☎ 0783-930049 Fax 0783-930118
e-mail: info@comune.baressa.or.it

Fòlliu periòdicu de informatzioni istitutzionali de su Comunu de Baressa

**Responsabilidadi e proprietadi de su
Comunu de Baressa (or)**

Annu III, n. 3

Acabau su 22 de maju 2013

Deu e sa Die SA DIE DE SA SARDIGNA

Est cun prexeri mannu chi s'Amministratzioni comunali cumbidat totu is Baressesus a Sa Die de sa Sardigna 2013 chi s'at a afestai **lunis 27 de maju 2013** a is **dexi de mengianu** (ore 10.00) in **sa pratza de**




sa crèsia de Santu Girorgi. Custu addòbiu est sa parti de acabu de unu progetu mannu pro afestai sa Die de sa Sardigna chi s'Amministratzioni comunali at bòfiu meda, presentendi a sa Regioni Autònoma de sa Sardigna una domanda de contributu chi est istètia atzetada. Duncas, cun dd'unu traballu bellu, fatu a manu de pari de su Comunu de Baressa, s'ufitziu lingua sarda, is maistus e is piciocheddus de s'iscola elementari e is atoris de sa cumpangia Teatro Tragodia, is pipius ant pòtziu pigai

parti a unu concursu a prèmius “Deu e sa Die”, fadendi disinnius e fumetus apustis de ai ascurtau is contus asuba sa Die fatus de s'espertu de istòria de sa Sardigna. Is bincidoris de su concursu, chi ant a èssiri premiaus lunis a mengianu in s'addòbiu aparitzadu in pratza de



crèsia, funt is chi ant fatu is disinnius pigaus comenti a sìmbulu de Die de sa Sardigna Baressesa e chi funt in amostu in custu Novas, in is manifestus e in is brochure e in is cumbidus pro sa Die. In prus, is pipius etotu ant aparitzadu una presentada istòrica e teatrali asuba is fatus acuntèssius in is tempus de s'abrilu 1794 e ant fintzas imparadu is cantus nodius de su pòpulu sardu gràtzias a su traballu de is maistus de s'iscola e de is atoris de sa cumpangia Teatro Tragodia. Duncas lunis 27 de maju in pratza de crèsia, a partiri de is



dexi de mengianu,



nc'at a èssiri unu ispetàculu bellu e praxili pro afestai sa Die de su pòpulu sardu totus impari. Est de importu a non manca...

Po indi iscìiri de prus...

Sa Die de Sa Sardigna est istada istituida de su Consillu Regionali de sa Regioni Autònoma de sa Sardigna cun sa lei n.44 de su 14 de Cabudanni 1993. Decrarat ca su 28 abrilu de onniannu si depit afestai sa die de su pòpulu sardu.

Su 28 de abrilu si bolint arregordai sa die de s'aciapa o, in atrus fueddus, s'avalotu chi fiat acuntèssiu in Casteddu su 28 abrilu 1794 e chi iat portau su pòpulu sardu a giai una bella puntada de pei a totus is piemontesus chi fiant in Sardigna e ddus torrai a mandai a Torino.

Ma comenti mai si fiant ribellaus aici? Pro ddu cumprendi tocat a torrai pagu pagu acoa in s'istòria. Seus in is annus chi sighint sa Rivoluzioni frantzesa de su 1789 e pròpiu in Parigi, in su mesi de cabudanni de su 1792, su Consillu provisòriu detzidiat s'invasioni frantzesa de sa Sardigna, chi, in cussus tempus, fadiat parti de su Rènniu Sabàudu. Sa flota frantzesa fiat arribada in Sardigna in su mesi de Idas de su 1792. Chena agatai resistèntzia peruna is frantzesus iant pigau s'isola de Santu Pedru, dd'iant torrat a nomenai “Isola de sa Libertadi” e apustis